

आकाशवाणी

- भारत ते न्यूजीलैंड नै रक्षा, शिक्षा, खेड्ड, बागवानी ते जंगलात दे खेत्तरें च 5एं समझौते पर दस्तखत कीते न।
- लोकसभा दे स्पीकर ओम बिरला होरें दिल्ली विधानसभा दे नमें चुनाएं दे विधायकें आस्तै दऊं दिनें दे इक सिखलाई प्रोग्राम दा उद्घाटन कीता।
- महाराष्ट्र च कल संजा मध्य नागपुर दे महाल इलाके च दऊं गुटें बश्कार तनोतनी पैदा होई गई।
- अमरीकी खुफिया प्रमुख होरें इस्लामी आतंकवाद दी विचारधारा गी खत्म करने दे अमरीका दे घेइयै गी बांदे कीता।
- रूसी राष्ट्रपति ब्लादीमीर पुतिन ते अमरीकी राष्ट्रपति डोनाल्ड ट्रंप यूक्रेन संघर्ष गी खत्म करने लेई अज्ज गल्लबात करगन।
- अंतर्राष्ट्रीय ओलंपिक समिति नै 2028 आलिएं लॉस एंजिलस ओलंपिक खेड्डें च मुक्केबाजी शामिल करने गी मंजूरी देई दिक्ती ऐ।

<><><><><><>

Indo-NZL

भारत ते न्यूजीलैंड नै रक्षा, शिक्षा, खेड्ड, बागवानी ते वानिकी क्षेत्रें च 5एं समझौते पर दस्तखत कीते गे न। दौनें मुखें बश्कार अधिकृत आर्थिक संचालन दबक्खया मान्यता समझौते दा बी आदान प्रदान होआ। दौनें मुखें मुख बपार समझौते पर गल्लबात शुरू करने ते पेशवरें ते कुशल श्रमिकें दी आओजाई, सखल्ली बनाने दी बवस्था पर गल्लबात दी घोशणा कीती। न्यूजीलैंड हिंद प्रशांत महासागर पहुंच च शामिल होने कन्नै गैं आपदारोधी बुनियादी ढांचे लेई गठबंधनद। मिंबर बी बनी गेआ ऐ। प्रधानमंत्री नरेन्द्र मोदी होरें कल नमीं दिल्ली च न्यूजीलैंड दे प्रधानमंत्री क्रिस्टोफर लक्सन हुंदे कन्नै भारत न्यूजीलैंड सरबंधें दे बक्ख-बक्ख पैह्लुएं पर गल्लबात कीती। श्री मोदी होरें प्रेस ब्यान च आखेआ जे उनें दबक्खया सरबंधें दे बक्ख-बक्ख पैह्लुएं पर व्यापक चर्चा कीती।

दौनें पक्खें रक्षा ते सुरक्षा भ्याली तगड़ी करने ते संस्थागत बनाने दा फैसला कीता। उनें आखेआ जे सांझे अभ्यास सखलाई ते बंदरगाह यात्राएं दे कन्नो कन्नी रक्षा उद्योग च आपसी सैह्योग लेई रोडमैप तैआर कीता जाग। प्रधानमंत्री होरें आखेआ जे दौनें मुख्यें आपे'चै दे लाह पजाने आले मुक्त बपार समझौते पर गल्लबात शुरू करने दा फैसला लैता ऐ जेह्दे नै आपसी बपार ते निवेश दिएं संभावनाएं गी बढ़ावा थहोग।

<><><><><><><>

Delhi MLA

दिल्ली विधानसभा दे नमें चुनोए दे विधायकें लेई अज्जै थमां नमीं दिल्ली च दऊं दिने दे सिखलाई कार्यक्रम आयोजन कीता जा'रदा ऐ जेह्दे च उनेंगी विधानसभा दे नियमें, तौर तरीके ते प्रक्रियाएं दे बारे च जानकारी दित्ती जाग। इस दरान उनेंगी पूरी तफसीली ते बरीकी कन्नै संसदीय प्रक्रियाएं, आचार संहिताएं ते शासन दे तौर तरीके कन्नै वाकफ कराया जाग। लोकसभा दे अध्यक्ष ओम बिरला इस कार्यक्रम दा उद्घाटन करगन। उद्घाटन समारोह च दिल्ली विधानसभा दे अध्यक्ष विजेन्द्र गुप्ता, उपाध्यक्ष मोहन सिंह बिस्ट, दिल्ली दियां मुख्यमंत्री रेखा गुप्ता, विरोधी धड़े दियां नेता आतिशी हुंदे सनें केई नामवर हस्तियां बी शामिल होंगन।

<><><><><><><>

Nagpur Tense

महाराष्ट्र च मझाटले नागपुर च महाल इलाके च कल संजा दऊं गुटें बश्कार तनोतनी पैदा होई गई। उत्थें धार्मिक प्रतीक दे कथित तौर पर भन्न त्रोट दिएं घटने करी दऊं समूहें च सांप्रदायिक तनाह पैदा होई गेआ। एह्दे कारण पथराव होआ ते किश असमाजी अनासिर गड्डिडएं गी फूकी दित्ता। तोआई दंगै पर काबू करने लेई तैनात पुलिस बलें चिटनिस पार्क ते महाल इलाके च भीड़े गी खिंड-बिंड करने लेई अत्थरू गैस दे गोले दागे ते लाठीचार्ज कीता। एह्दे मगरा पुलिस दी साइबर टीमें सीसीटीवी फुटेज खंगाले ते हिंसा च शामिल तकरीबन 15एं असमाजी तत्वे गी गिरफ्तार करने लेई तपाशी अभियान बी चलाया। तोआई केन्द्री मंत्री नितिन गडकरी ते महाराष्ट्र दे मुख्यमंत्री देवेन्द्र फडनवीस होरें लोकें गी असमाजी तत्वे पर जकीन नेई करने ते अमन शांति ते सद्भाव बनाई रखने दी अपील कीती।

<><><><><><><>

US-Religious

अमरीकी खुफिया प्रमुख तुलसी गबार्ड होरें आखेआ ऐ जे बंगलादेश च हिंदुएं समेत दुए अल्पसंख्यकें दी लगातार माड़ी हालत गी लेइयै अमरीका फिक्रमंद ऐ। इक निली चैनल गी दित्ते गेदे साक्षात्कर च उनें बंगलादेश च बिगड़दी स्थिति दी नुख्ताचीनी कीती ते चरमपंथी ताकतें ते इस्लामी आतंकवाद कन्नै निबड़ने च ट्रंप प्रशासन दे पक्के धेइयै बारे दस्सोआ। उनें आखेआ जे ट्रंप प्रशासन वैश्विक सतह पर इस्लामी आतंकवादिणं गी बढ़ावा देने आले विचारधारा गी हटाने लेई वचनबद्ध ऐ। श्रीमती गबार्ड होरें आखेआ जे ट्रंप प्रशासन नै बंगलादेश च मोहम्मद यूनुस दे नेतृत्व आली अंतरिम सरकार कन्नै गल्लबात शुरू करी दित्ती ऐ। उनें बंगलादेश समेत दुनिया दे बक्ख-बक्ख हिस्से च इस्लामिक खिलाफते लेई मंच तैआर करने च चरमपंथी तत्वे ते आतंकिणं आस्सेआ कीती जा'रदिणं साजशें बारे बी गल्ल कीती।

<><><><><><>

Trump

अमरीका दे राष्ट्रपति डोनाल्ड ट्रंप होरें अज्ज यूक्रेन युद्ध गी खत्म करने दे मुद्दे पर रूस दे राष्ट्रपति ब्लादिमीर पुतिन हुंदे नै गल्लबात करगन। रूस दे राष्ट्रपति निवास क्रेमलिन दे प्रवक्ता दमित्री पेस्कोव होरें इस गल्लै दी तस्दीक कीती ऐ ते दौनें नेताएं बश्कार गल्लबात लेई तैआरियां चलै करदियां न। अजें कि उनें इस बारे तफसीली जानकारी देने थमां इंकार करी दित्ता ऐ। राष्ट्रपति ट्रंप होरें यूक्रेन दी लड़ाई खत्म कराने दिणं अपनिणं कोश्टें दे हिस्से दे तौरा पर ऐतवारें रूस दे राष्ट्रपति हुंदे कन्नै गल्लबात दी योजना दी घोशणा कीती ही। उनें इब्बी जिफ्र कीता हा जे जिमीं ते ऊर्जा सयंत्रें पर गल्लबात इस मलाटी दे प्रमुख विषय च शामिल रौंहगन।

<><><><><><>

IOC Boxing

अंतर्राष्ट्रीय ओजंपिक समिति 2028 लॉस एंजिलस ओलंपिक खेड्डें च मुक्केबाजी गी परतियै शामिल करने दी मंजूरी देई दित्ती ऐ। इस फैसले दा सुआगत करदे होई विश्व मुक्केबाजी दे अध्यक्ष बोरिस वैन डेर वोस्ट होरें आखेआ ऐ जे इक बड़ा महत्वपूर्ण फैसला ऐ ते एह्दे नै ओलंपिक खेड्डें च मुक्केबाजी दी ब्हाली गी ताकत थ्होई ऐ। 2022 च उसलै दे अंतर्राष्ट्रीय महासंघ गी लेइयै चला'रदिणं चिंताणं दे चलदे अंतर्राष्ट्रीय ओलंपिक समिति आस्सेआ मंजूर 2028 लॉस एंजिलेस खेड्डें च मुक्केबाजी गी शामिल नेई हा कीता गेआ।

<><><><><><>

Kabaddi

कौड्डी दे विश्व कप 2025 च अज्ज संजा इंग्लैंड च वॉल्वर हैम्टन मैदान च भारत दी मर्दे ते महिलाएं दियां दवै टीम उतरगंन। भारतीय सभें मताबक साढ़े 5 बजे महिला टीम दा मकाबला ग्रुप-डी दी पेल्स टीम कन्नै होग जिसलै जे रातीं साढ़े 10 बजे मर्दे दी टीम दा मकाबला स्काटलैंड कन्नै होग। कौड्डी विश्व कप 2025 दी शुरूआत कल होई ह ीते पैहले रोज भारती मर्दे दी टीम नै इटली गी 64-22 कन्नै हराइयै अपने अभियान दी शुरूआत कीती ही। एह्दे शा पैहले उद्घाटनी मैच च मेजबान इंग्लैंड नै हंगरी गी 101-25 कन्नै हराया ऐ।

<><><><><><>

US

अमरीका दे राष्ट्रीय अंतरिक्ष प्रशासन नासा नै घोषणा कीती ऐ जे 9 म्हीने कोला मते सभें तगर अंतर्राष्ट्रीय अंतरिक्ष स्टेशन पर डकोए दे बुच विलमोर ते सुनीता विलियम्स अज्ज रातीं लै धरती पर परतोई औंगन। ड्रेगन अंतरिक्ष यान कल बडलै 3 बज्जियै 27 मिंटे पर धरती पर उतरग। इक अधिकारिक ब्यान च एनएआईए नै आखेआ ऐ जे इंतर्राष्ट्रीय अंतरिक्ष स्टेशन थमां क्रू-9 मिशन दी वापसी लेई हालात पूरी चाल्ली साजगार न। मेद ऐ जे एह् फ्लोरिडा आले समुंद्री कंडे कोला दूर समुंद्रै च आई उतरगंन।

<><><><><><>

IMD

भारतीय मौसम विभाग नै अज्ज उत्तरी ओडिशा दे अंदरूनी इलाके च गर्म ब्हाएं आली स्थिति बनी सकने दी शैका जताई ऐ। जिसलै जे गुजरात, कोंकण, गोवा ते उत्तरी कर्नाटक दे अंदरूनी इलाकें च गर्मी दे कन्नो कन्नी गुम्मे आला मौसम बने दा रौह्ग। इनें इलाकें च ऐसा मौसम अगले दऊं त्रऊं दिनें तगर बने दा रौह्ग। मौसम विभाग नै पूर्व उत्तर राज्यें च अज्ज गर्जी चमकियै बरखा बरने दे बी आभार दस्से न।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौह्ने आले श्रोताएं कन्नै बचार सांझे करगंन।

हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 120मीं किश्त होग। कार्यक्रम च शामिल करने लेई लोक अपने बचार ते सुझाह 28 तरीक तगर टोल फ्री नंबर 1800—11—7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात ते तुरत मगरा एहदा डोगरी च अनुवाद प्रसारत कीता जाग। एहदा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>